

رواية

دنيا & نور

الكاتب

يوسف فريد

الغلاف



الكاتب يوسف فريد المصري

المؤلف:

موقع مكتبة الكتب

الناشر:

المشرفة الإدارية والمدققة اللغوية

إشراف:

جيهان حمادي

تاريخ النشر:

2023/12/14

عدد الصفحات:

38

التصنيف:

رواية

الغلاف:

المصممة جيهان حمادي

بسم الله الرحمن الرحيم

والصلاة والسلام علي سيدنا محمد أشرف خلق الله ...

أما بعد،

أساس نجاح أي مجتمع يبتدئ دائما من الأسرة....

الأسرة السليمة السوية تخرج طفلا سليما للمجتمع، ولكن -لأن يوجد بمجتمعنا مشاكل كثيرة مرتبطة بالعائلات تسبب خلا في نشأة الطفل وتربيته، ولعل من أهم هذه المشاكل هو انفصال الوالدين وتشنت الأطفال، هذا ما شجعتني أن أكتب (دنيا ونور) في محاولة مني لتوجيه النصيحة للأسر وخصوصا الآباء بشكل خاص للحفاظ علي اطفالهم والتمسك بهم وتحمل مسؤوليتهم حتى لا يصل طفلك إلى الضياع حينئذ لن تتمكن من ملاحقته ، و ما هي إلا مبادرة مني وحباً للمجتمع المصري والأسرة المصرية وتمنياتي لهم بلم الشمل وتكون الأسر المصرية كلها مترابطة وسعيدة...

صحيح أنّ أبطال قصتنا من وحي الخيال لكن أحداثها واقع تعيشه كثير من الأسر المصرية.

نتمنى لكم قراءة ممتعة والله ولي التوفيق...

يوسف فريد

الفصل الأول

دنيا ونور

أنا اسمي دنيا عمري 15 سنة في الصف الأول الثانوي.. أنا تلميذة ذكية ودائما أكون من الأوائل عشت مع أبي وأمي وبحبهم أوي وهما كمان بيحبوني لأنني أنا بنتهم الوحيدة ومعنديش أخوات....

أنا عندي في المدرسة صحاب كتير من سني وكلهم بيحبوني وبيحبوا يتكلموا معايا وبنذاكر سوا....بس اكثر صاحبة مقربة ليا هي نور، هي صاحبتني وجارتي وأجمل صديقة أنا مولودين في نفس اليوم...بس اكثر حاجة مضايقتني إنها عكسي في حاجات كتير بس رغم كده مقدرش أسببها لأنها صديقة عمري ولأنها زي معندهاش أخوات....نور كانت كويسة وحياتها مستقرة وشاطرة في المدرسة لحد من خمس سنوات فجأة باباها انفصل عن والدتها ومبقاش موجود ومن يومها مامتها اتغيرت وهي كمان اتغيرت ومبقتش زي الأول...

وعشان كده أنا دائما بحاول مزعلش منها وأكون دائما جنبها وبدعما... هسيبكوا دلوقتي عشان ماما بتنده عليا

=يا دنيا تعالي ...

_نعم، يا ماما؟

=يلا عشان نور مستنياكي ، يلا عشان متاخروش علي المدرسة

_حاضر يا ماما جاية

=خلي بالك على نفسك يا حبيبتي

=فين البوسة بتاعة ماما قبل ماتنزلي

_وانا اقدر انسي يا حبيبتي ...اهو

رواية دنيا ونور

يوسف فريد

=يلا يا حبيبتي ربنا يوفك، لما ترجعي تحكي لي كل الي حصل في يومك

_حاضر ياروحي...باي

=باي

راحت دنيا ونور سوى للمدرسة وهما في الطريق بيتبادلوا أطراف
الحوار

نور:يلا بقي ياست دنيا

دنيا:انا جيت اهو

نور:ليه كل ده تأخير

دنيا:مرة من نفسي تستتيني منا كل يوم بستناكي وبعدين انا كنت سهرانة
بذاكر فراحت عليا نومة مش قاعدة ع انت للفجر يا صديقتي ولا نسيتي؟

نور:غاوية إنتي تتعبي نفسك في مذاكرة وكلام فاضي في الآخر كده كده
المدرسة هتدينا درجة النجاح في الأول وفي الآخر دي مدرسة خاصة
وإحنا بندفع لهم فلوس...

دنيا :منا قولتلك قبل كده وهقولك تاني أنا مش بذاكر عشان أنجح وبس
ولا عايزة أبقي حافظة المنهج من غير فهم..أنا بحب أفهم إلي
بدرسه..ونفسي أكون دكتورة تخدم المجتمع .

نور:والله إنتي تاعبة نفسك ع الفاضي دكتورة إيه ؟ ، وكلام فاضي إيه؟
هتكسبي إيه يعني من مهنة مبتقدرش في المجتمع؟ ...إنتي عارفة إن
في ناس على النت مش متعلمة خالص بس بتعمل فيديوهات على النت
وفي ثواني ممكن تبقي محققة ملايين

دنيا:ومين الي قالك بقي يا نور إن النجاح بيكون بالريح المادي
وبس ..مش كل النجاح فلوس..أنهي الاحسن من وجهة نظرك؟..أكون
دكتورة وأنقذ حياة حد بيموت ولا أعمل فيديو ملوش اي منفعة؟

رواية دنيا ونور

يوسف فريد

نور: يادي الشعارات والفلسفة بتاعتك الي مبتاكلش عيش

دنيا: دي مش فلسفة دي عقيدة بس إنتي مش هتفهميها لأنك ببساطة
مش عايزة.... وبعدين بقولك إيه يلا بينا عشان هنفضل نرغي ونتأخر ع
المدرسة شغلي شوية خلىنا نلحق نوصل علي الطابور .

نور: معاكي حق يلا بينا.

أول ما وصلوا للمدرسة التقوا بالمستر أحمد

مستر أحمد: صباح الخير يا بنات

البنات : صباح النور يا مستر

مستر أحمد: مين فيكوا ذاكرت الحاجات الي انا قولت عليها في العلوم

دنيا وتلاتة من البنات: تمام يا مستر ذاكرناها وفهمناها

مستر أحمد: طب والباقي فين؟ تمام...إلي مش محضر يقوم يقف .

قامت كل الطالبات الي مش محضرة وقفت ماعدا نور

مستر أحمد :وأنت بقي يا نور محضرة الدرس؟

نور: لأ

مستر أحمد: ومقومتيش وقفتي ليه ؟

نور: مزاجي

مستر أحمد: نعم!!

نور :بقولك إيه يامستر فكك مني مش كل حصة هتقعد تصدعني بذاكرتي
ومذاكرتيش...انا زهقت.

مستر احمد: فكك؟..وزهقتي...لاا إنتي الظاهر نسيتي يعني إيه مدرس
ويعني إيه طالب وأنا صبرت عليك كثير لكن أكثر من كده

رواية دنيا ونور

يوسف فريد

خلاص... اطلعي بره والمره الجاية متجيش حصتي من غير ولي امرك
لأني مش هدخلك فصلي .

نور : أحسن انا كده كده مش حابة أتعلم ومش هجي المدرسة دي تاني.

بعد نهاية اليوم الدراسي راحت دنيا لغرفة المدرسين خبطت
واستأذنت بالدخول وراحت لمستتر أحمد

دنيا: إزيك يامستتر

مستتر أحمد: أهلا يادنيا إتفضلي

دنيا : هو حضرتك ناوي تتكلم مع المدير وتفصلوا نور من المدرسة

مستتر أحمد: لا يا دنيا طبعا مش هيحصل أنت عارفة إني بحب الطلبة
ومش بحب أضرهم انا بس كل الفكرة اني مش راضي عن سلوكها ولا
مستواها الدراسي وعايز أساعدها وحريص على مصلحتها... وعشان كده
أنا محتاج أتكلم مع والدتها ضروري لأن مش أنا المدرس الوحيد الي
بيشتكي ده تقريبا كل المدرسين بيشتكوا ...

وفي حاجة يا دنيا أحبك تكوني فاهماها أنا لما أسأل وأهتم بمستوي
الطلبة في التحصيل الدراسي وأعاقبه لو قصر ده معناه أني بحبه
وحريص عليه زي إبنني... صحيح إني ضد الضرب بس لازم أكون مطمئن
على استيعاب الطالب ونسبة مذاكرته... تفتكري أنا مقدرش أدخل أفضل
قاعد في الفصل طول الحصة وأجي في الآخر أقولكوا ذاكروا من
صفحة كذا كذا... أو أستغل الفرصة عشان أديكوا دروس بره
المدرسة... في مدرسين كتير بتعمل كده بس ده غلط وحرام وأنا مقدرش
أعمله أنا حريص على الطالب قبل أي حاجة لأنني هتسئل عليه...

أنا محتاج أتكلم مع والدة نور ضروري الموضوع كبير.

رواية دنيا ونور

يوسف فريد

دنيا: ما هو أنا كنت عايزة أقول لحضرتك زي ما حضرتك عارف والدة نور بتشتغل طول اليوم فعشان كده هيكون صعب إنها تيجي المدرسة الصبح.

مستر أحمد: والله أنا صبري على كل أخطاء نور كان من أجل والدتها وعلى فكرة والدها هيتسئل على إني هو عامله لأنها مسؤوليته في المقام الأول وهو متخلي عنها ومحمل والدتها فوق طاقتها وكده هو بيدمر بنته .

دنيا: مع حضرتك حق هو ساب البيت فجأة وانفصل عن والدتها وده لخبط موازين البيت والمشكلة أنو هو من ساعتها لا بيظهر ولا بيسأل عن نور أو بيحاول يشوف هي محتاجة إيه أو إيه الي ناقصها وهو ده الي مخليها في إني هي فيه .

أنا هحاول أوصل الموضوع لوالدتها بس هفكر الأول أقولها إزاي عشان متاخذش رد فعل شديد تجاهها...أنا من زمان بحاول أغير نور بطريقة غير مباشرة بس مش عارفة

مستر أحمد: والله إنت صاحبة أصيلة يا دنيا أنك بتحبي صاحبك في كل الظروف دي.

دنيا: مقدرش أبعد عنها لأنها بنت روعي إحنا من يوم ما إتولدنا وإحنا إخوات ونعرف عن بعض كل حاجة وأنا عمري ما هسيبها وهفضل وراها لحد ما تتغير.

مستر أحمد: أنا مقدر نبلك بس مش هتقدري لوحدك تغييرها لازم هي تساعدك وعشان هي تساعدك لازم أبوها وأمها يساعدها دنيا: أوعدك إني هحاول أكلم مامتها ومش هسيب الموضوع .

رواية دنيا ونور

يوسف فريد

مستر أحمد: وأنا واثق في حبك لصاحبتك وواثق في ذكائك يا تلميذتي النجيبة، يلا روي عشان متاخريش وقوليلي الحصة الجاية هتوصلي لإيه.

دنيا: حاضر يا مستر... سلام أشوفك بكره.

في الوقت إلي كانت دنيا فيه بتكلم مستر أحمد كانت نور رجعت على البيت ودخلت فضلت تبكي فترة طويلة لحد الليل لحد ما مامتها جات من الشغل.

والدة نور: أهلا بعملتي الأسود قاعدة بتعيطي ليه؟ عملتي مصيبة إيه؟

نور: ماما أنا عايزة أتكلم معاكي أرجوكي...

والدة نور: أنت شايفاني فايقة لكلام أوي ما تخلصي تقولي عايزة إيه؟

نور: ماما أنا تقريبا إترفدت من المدرسة ومش هيرجعوني إلا لما تيجي.

والدة نور قامت تضرب فيها ، وقالت :يا نهارك أسود طول عمرك خايبة انا بكرهك بقولك إيه امشي اطلعي بره.

نور:يا ماما بس...

والدة نور: هي كلمة إطلعي بره أنت خلاص ملكيش مكان عندي خسارة فيكي شغلي وتعبي ليل ونهار عشان أعلمك وأربيكي وفي الآخر تترفدي.

نور :هو أنت ليه بطلتي تسمعيني ليه بطلتي تاخذيني في حضنك ليه كل مرة ببقي نفسي أتكلم معاكي بتسيبيني وتقوليلي انا مش فاضية...انا بنتك ومحتاجالك

والدة نور:لا يا حبيبتي إجابات الأسئلة دي الي يرد عليها البيه أبوكي....يلا بره بيتي

فوجئت دنيا وأهلها حوالي الساعة عشرة بالليل بالباب بيخبط فتحوا لاقوا نور بتبكي.

رواية دنيا ونور

يوسف فريد

والدة دنيا :مالك يا حبيبتي تعالي خشي...وحضنتها .

نور : طنط انا محتاجة دنيا.

والدة دنيا: جوه يا حبيبتي ادخليها.

دخلت نور في أحضان دنيا بالدموع، وقالت: أنا وحشة أوي أنا ما استحقش أعيش.

دنيا: إوعي أسمعك بتقولي كده إنت أحسن حد في الدنيا.

نور:إمي طرطني وإترفدت من المدرسة ومحدث بيحبني أنا سيئة أنا مش عايزة أعيش.

دنيا:بعد الشر عليكى هتعيشي وهتجحي وكل حاجة هتتحل أنا بحبك وجنبك وفي ظهرك ومش هسيبك.

نور:أنا ممكن أنام عندك لحد بكره؟

دنيا :ده بيتك مش محتاجة تسألني .

نور:طب أنا عندي طلب تاني ممكن أنام في حضن مامتك لأنها لما حضنتي أنا حسيت بالأمان وأنا من زمان ماما ما حضنتيش ولا بابا كان بيحضنتني.

دنيا:حاضر هقول لماما وهي مستحيل ترفض.

سابت دنيا نور نائمة في حضن والدتها وفكرت مع نفسها أنها تحاول تدور على والد نور عن طريق الأنترنت...

ترددت في البداية وخافت لتفكيرها يعمل مشكلة لكنها رجعت فكرت في وضع نور علميا ونفسيا والضغط الي هي عايشة فيه وجربت تدور على والد نور عن طريق الفيسبوك لأن رقمه الي كانت عارفاه مابقاش ليه وجود وبالفعل بعد محاولات عديدة قدرت تعثر عليه ودخلت تتكلم معاه.

رواية دنيا ونور

يوسف فريد

دنيا: عمو علي إزاي حضرتك؟ أنا دنيا صاحبة نور بنتك، ما عرفش حضرتك هتفتكرني وإلا لا؟ لأن شكلي اختلف عن آخر مرة حضرتك كنت موجود فيها أتمني حضرتك تقرأ رسالتي وتسمعني، نور كبرت وبقت في سن خطر ومحتاجالك جنبها ولو ملحقتهاش إنت هتكون بتخسرهما للأبد بلا رجعة، ولو كنت ضيعتها في الي فات في الي جاي مش هين إلي جاي لو سبتها لو حدها هيكون تدمير لنور وحقيقي أنا مش هقدر أسامحك لو صديقة عمري جرالها حاجة وفي النهاية حضرتك حر في قرارك.

في الصباح الباكر صحيت دنيا وأسررتها على صوت عالي جاي من شقة والدة نور.

والد نور: البنت فين؟ إيه الي حصلها؟ إتكلي ...

والدة نور: إنت بأي حق جاي تزعلي وتسالني وتحاسبني؟ أنا الي المفروض أحاسبك ...

والد نور: قولي أيه الي حصل لدنيا؟

دنيا: نور إترفدت من المدرسة .

والد نور: يا ما شاء الله هي دي تربيتك يا هانم.

والدة نور: تربيتي؟ وأنت لما جاي تعيب علي تربيتي أنت كنت فين؟ وإنت سايبني انا وبنتك خمس سنين أكل وأشرب وأعلم حتى من قبل الخمس سنين كنت بسكت على عمايلك وبخلك وعيشتك القاسية عشان كنت بتقي ربنا فيك وفي سمعتك وإنت الي جاي تزعلي وتحاسبني.... وبعدين لحظة واحدة إنت مين أصلا الي كلمك؟ وقالك تيجي أو قالك أننا محتاجينك؟

والد نور: هو ده الي يهملك؟

والدة نور: أه هو ده الي يهمني.

والد نور: دنيا صاحبته.

رواية دنيا ونور

يوسف فريد

والدة نور: هو أنت مين الي قالك تكلميه مين إداكي الحق؟ هي كانت حياتك؟، باتت عندك وقولت ماشي انما تتدخلي في حاجة متخصصكيش ده أنا مش هسمح بيه... من هنا ورايح ملكيش علاقة ببنتي ولا تتعاملني معاها.

دنيا: أنا مقدره غضب حضرتك لكن أنا مش هسيب نور، وأنا فعلا خفت عليها.

والدة نور: تخافي عليها تكلمي إلي دمرها إنت عيلة تفهمي إيه أنت ولا تعرفي إيه؟ عشان تتصرفي تصرف زي ده؟

والد نور: أنت بتلومي على مين؟ ما تلومي نفسك الأول على تربيتك الفاشلة.

والدة نور: تربيتي الفاشلة؟ يا بجاحتك.

في أثناء المشاجرة إتفاجأ الجميع بضابط الشرطة دخل العمارة ومعاه مجموعة من العساكر وسأل الواقفين: « حد يعرف فين الشقة الي ساكنة فيها نور علي محمد»

رد والدها: أنا أبوها حضرتك إيه الي حصل؟

رد الضابط: طبعا أب وأم بيتخانقوا لازم تكون دي النتيجة...إلي حصل يا محترم إن في تطبيق ممنوع في مصر بيوهم الشباب أنه هيديهم فلوس مقابل فيديوهات وبنتك كان من ضمن الناس الي بثوا محتوى على التطبيق ومطلوبة عشان نحقق معاها.

والد نور: إتفضلي يالي بتلوميني شوفي آخرة تربيتك.

في الوقت ده كانت نور واقفة وراء الباب في بيت دنيا بتسمع الي بيدور ما بين والدها ووالدتها وفي اللحظة الي سمعت فيها الضابط بيقول إنها مطلوبة للتحقيق فتحت الباب وطلعت تجري بسرعة جنونية حاول الكل يجري وراها يلحقها...وفي لحظة من الزمن جات عربية مسرعة سرعة

رواية دنيا ونور

يوسف فريد

جنونية صدمتها وسقطت في بركة من الدماء وسط حالة بكاء وذهول من
الجميع...

الفصل الثاني

نور مبين الحياة والموت

في المستشفى كانت نور في حالة شديدة الخطورة والأطباء يحاولوا إسعافها وكانت دنيا بتتبرع بدمها لنور، وفي صالة الإستقبال كان والد ووالدة نور جالسين على مسافة بعيدة عن بعض في حالة من الصمت وانطفاء الروح والذهول ، وبعد وقت طويل قطع الصمت صوت والد نور وقال لوالدها: أنت السبب في كل ألي إحنا وصلناله

والدة نور : هو إنت بجد شايف إن ده وقته إنك تقول كلام زي ده...

والدها: أه وقته، لأنك لو كنت من الأول ما أخذت بالك من بنتك الي أنا المفترض سايبهاك أمانة وراقبتها رايحة فين وجاية منين وبتعمل إيه ما كناش وصلنا للمرحلة دي ... أنا كنت بالصدفة في مصر وقت ما قرئت الرسالة...افرضي ألي كنت سافرت كان هيبقى إيه الوضع، ذنب بنتي في رقبته.

والدها: بنتك؟.. لا تعالى بقى...دلوقتي عرفت إنها بنتك...ولما هي بنتك إنت كنت فين من 10سنين كنت فين وأنا بقوم بدور أب وأم وربنا وحده الي يعلم أنا كنت بعمل إيه علشان أصرف عليها وأعلمها وأكل وأشرب....وحضرتك ولا على بالك وسافرت وعشت حياتك ومسألتش فيها ولا فيا...أنا شلت مسؤولية كانت مسؤوليتك إنك تشيلها فلو فينا حد غلطان ومسؤول عن الي احنا وصلناله يبقي إنت... قبل ماتلومني لوم نفسك...

والدها:ومين الي خلاني أمشي وأسافر مش طريقته وعصبيتك وطلباتك الي مبتنتهيش .

رواية دنيا ونور

يوسف فريد

والدتها :إنت لسه بتكابر يا أخي خلي عندك إحساس بقي، مين قالك أنك لما تبعد متسألش على بنتك ولا تهتم بها ولا بمسؤوليتها؟ ...أقولك خلاص أي كلام هتقوله معادش هيفيد لأنها خلاص راحت اسكت أحسن متزودش وجعي...

سكت الأب وجلس في حالة من اليأس...في اللحظة الي دخل فيها الضابط للمستشفى وتوجه لوالد نور بالكلام:

أحب أقولك إن سترها مع بنتك وقدرنا نوصل للي نشر التطبيق في مصر وروجله هو والي معاه صدقتي لولا كده كانت بنتك والي زيها مستقبلهم ضاع ودخلوا السجن وهما معملوش حاجة.

والد نور :الحمد لله

الضابط:كان المفروض إني أكون بتكلم معاها وأقل معاها المحضر بس معلى لما تقوم بالسلامة هجيلها تاني.

بس احب أنصحك نصيحة بنتك مش محتاجة تليفون ،بنتك محتاجة أهل محتاجة أب وأم محتاجة رقابة ورعاية ... ياريت لما ربنا يقومها بالسلامة تلاقيك جنبها أب بجد.

والد نور:للأسف معاك حق، مش عارف أشكر حضرتك إزاي.

الضابط:مفيش شكر ولا حاجة أنا عندي بنات ودنيا زيهم، ربنا يطمنكوا عليها ولما تقوم بالسلامة وتفوق ياريت تبلغني ، أستاذن أنا .

والد نور:في رعاية الله يافندم.

في اللحظة الي خرج فيها الدكتور من غرفة العمليات وتوجه ناحيته وناحية وناحية والدة نور أسرعوا ناحيته وسألوه:- طمننا يادكتور إيه الأخبار ؟

رواية دنيا ونور

يوسف فريد

الدكتور مخبش عليكم إحنا قدرنا نوقف النزيف ونقلناها دم عن طريق دنيا صديقتها لكن لسه حالتها خطر ولسه في غيبوبة مش قادرين نعرف هتنتهي امتي

والد نور: يعني يا دكتور في أمل أنها تعيش ؟

الدكتور: إحنا حاولنا ننقذ الحالة بكل ما نقدر ومفيش في إيدنا حاجة تاني نعملها الباقي على ربنا، ادعولها...

الأب والإم في نفس اللحظة: يا رب

مر وقت طويل من الصمت قطعه صوت والد نور: أنا عارف إن أنا غلظت بس أنا مغلتش لوحدي إنتي كمان غلظتي.

الإم: أنا غلظت صحيح لكن غلظي كنت إنت السبب فيه لأن مفيش بيت بينشأ صح من غير ما يكون فيه طرفين، رجل وست يشاركوا بعض المسؤولية أنا بريي وإنت بتصرف إنت بتشد وأنا برخي، إنما لما أشيل على كتافي كل المسؤوليات وأقوم بدوري ودورك طبيعي إني أغلظ لأن الحمل ثقيل.

والد نور: معادش ينفع لا لوم ولا عتاب مش هيرجع الي فات ولا هيمحي الي حصل ولا هيصالح حاجة... أنا نفسي تسامحيني ونرجع نعيش سوا تاني.

الإم: صعب، صعب، صعب، إني أنا أنسى حتى لو حاولت صعب إني أنسى ضربك ليا وقسوتك عليا وبخلك معايا وإنك على طول محسستي إن أنا مش ست ولا إنت بتحبني ودايما بتبص لغيري وآخرتها سافرت وسببتي أنا وبنتك وطلقتني وروحت إشتغلت وعشت حياتك تفتكر أنا هعرف أغفر كل ده؟

رواية دنيا ونور

يوسف فريد

الأب: أنا عارف أنه صعب تسامحيني بس حاولي تغفري حتى عشان خاطر البنيت.

الإم: الخمس سنوات عذاب الي أنا شفتهم محفورين على وشي وفي روعي شقاء وتعب ومسؤولية مش هيتمسحوا في لحظة والبنيت الي انت بتقولي أسامحك عسانها أنا مش ضامنة هتعيش وإلا لا ، كان ليه من الأول توصلنا لكل ده؟

الأب: وأنا مش هضغط عليك حقا تفكري ولو ملاقيتيش نفسك قادرة ترجعي انا مش هغصبك، بس في كل الاحوال لو بنتنا قامت بالسلامة ، أنا مش هتخلي عنها تاني.

الأم: أدي أنت قولت ، لما تقوم بقى بالسلامة.

الأب للممرضة: لو سمحتي، هو احنا ممكن نشوف البنيت؟

الممرضة: بس مش أكثر من خمس دقائق.

الأب: ولو دقيقة أنا موافق.

دخل الأب والإم على نور يشوفوها ومسك الأب إيد نور وقال:

نور...حقك عليا حقك عليا في كل السنين الي فاتت وكل حاجة حصلتلك بسببي أنا جنبك ومش هسيبك...أنا عندي استعداد أسيب الشغل والسفر والدنيا كلها وأفضل قاعد جنبك بس أسمع صوتك وأحضنك وأعوضك عن كل السنين الي مكنلكيش فيها أب... نور...متسيبينيش...

للحظة حدثت مفاجأة مدهشة محدش توقعها وهي إن نور فاقت من الغيبوبة للحظة مسكت إيد والدها وإيد والدتها وضمت إيديهم جامد وحطتهم على بعض في لحظة عجز فيها الأب والأم عن التعبير وفضلوا باصين لبعض بدون كلام....

رواية دنيا ونور

يوسف فريد

الأم: ولا أنت بتتغير لسه زي ما أنت لو مصايب الدنيا كلها حواليك لازم تضحك.

الأب: يعني أفهم من كده إن في أمل؟

الأم: مش هقدر أرد عليك في أي حاجة قبل ما أطمئن على بنتي الاول

الأب: وأنا هستنى...

في بيت دنيا كانت قاعدة دنيا في غرفتها حزينة رافضة الأكل وغارقة في البكاء، وغابت عن المدرسة والدروس والدنيا كلها، وفضلت

رواية دنيا ونور

يوسف فريد

تقلب في صورها مع نور وتفكر ذكرياتهم سوى من الطفولة لغاية
دلوقتي....

لحد ما دخلت عليها والدتها وتوجهت بالحديث لها:

دنيا يا حبيبة قلبي ونور عيني وثمره فؤادي... أنا عارفة قد إيه إنت حزينة
على نور، وعارفة كمان إنك بتحببها، الي بيحب حد ما بيعملش في نفسه
كده، أنت طول عمرك أنت الي كنت بتسندبها وتدعميها، وعشان كده
لازم لما تفوق تلاقيكي قوية كعادتك ومتشوفكيش أبدا في الحالة دي.

دنيا: أنا مش قادرة أستوعب إنها ممكن تروح مني دي أختي وصاحبتي
وتوأمي...

الأم: عارفة، وعشان كده لو بتحببها إدعيها ربنا يرجعها لك ، ده أجمل
وأحلى مليون مرة من البكاء، عارفة زمان أنا كنت زيك كده ببكي من أقل
حاجة، بس لما كبرت بقيت قوية واتعلمت أصمد وأعيش عشان خاطر
الي بحبهم....

أنت كمان أقوي واستحملي، لا نور ولا أنا ولا أي حد بيحبك هيفرح أنك
سايبة مدرستك وعاملة في نفسك كده، ولا ده هيغير حاجة، استحملي
وكل ده بكره يزول وترجعوا تاني مع بعض أحسن من الأول.

دنيا: أنا بحبك أوي يا ماما.

الأم: وأنا بعشقك يا ست البنات يارب يريح قلبك ويبسطك ويرجعك نور
بالسلامة تاني.

دنيا: يارب.

استجابة لكلام والدتها قامت دنيا اتوضت وصلت ودعت ربنا وقالت:
يارب ... نور مش صاحبتي يارب نور أختي يارب الي عوضتني عن عدم
وجود أخوات يارب.... يارب رجعها ليا يارب وقومها بالسلامة وإشفيها
ومتورينيش فيها سوء يارب مش هقدر أتحمل... احفظها وأنقذها يارب...

في الصباح الباكر كانت دنيا في المدرسة بعد غياب استمر حوالي أسبوع كانت بوجه شاحب ووزن أقل وأول ما ظهرت اتوجه لها عدد كبير من المدرسين وبدأوا بالسؤال عن حالة نور عاملة إيه وبتحسن وإلا لا وردت عليهم دنيا بالانتظار وإن لسه مفيش جديد والأمور بإيد ربنا...

لحد ما وصلت لنهاية اليوم الدراسي وفوجئت بمدرس بينادي عليها:

دنيا... دنيا.... أنت صديقة نور مش كده؟

قالتله: اه، بس أنا بيتهيألي أول مرة أشوف حضرتك.

قالها: أنا اسمي مستر رجب كنت في مدرسة تانية ولسه متعين هنا جديد بس لما سمعت اسم صاحبتك لفت نظري عرفت أنك صاحبته المقربة وسألت على حالتها لأنها كانت عندي في الدرس قبل كده بره المدرسة، والحقيقة إنه أنا لفت نظري حاجة غريبة عمري ما شفتها في أي بنت هي ذكية جدا بس في شئ مخوفها بيخلي عقلها يقف أو حزينه من حاجة عندها أزمة لأنها في الدرس لما كنت بزقق مكانتش بتفهم حاجة خالص لما فهمتها بلطف لاقيتها بتجاوب أذكى من كل الي عندي.... هي البنت دي إيه قصتها؟

دنيا : والله يا مستر هي الحكاية طويلة بس أنا مش قادرة أحكيها أنا ضغطت على نفسي ضغط كبير عشان أجي المدرسة وأقدر أخش الفصل من غير ما تكون معايا ونهزر سوا... بس ادعيها يا مستر تقوم بالسلامة.

المستر: هتقوم بالسلامة بإذن الله ولما تفوق أنا عايزها في المجموعة عندي لأنها مخها جميل وأنا هعرف اطلع منها طالبة متفوقة.

رواية دنيا ونور

يوسف فريد

بتلتفت دنيا لقت جدتها لأبوها وكانت عنوان وقمة في الأناقة وأصغر سنا
مما رحلت...

توجهت لها: جدتي وحشتيني.

ردت العمّة على الجدة: ليه أسيبها؟ ماهي معانا وفي وسطينا ومننا ومن
أهلنا وكانت واحشانا.

ردت الجدة بعنف: لاااا مش معانا البنت لسه صغيرة ومكانها مش هنا
مكانها في كلية الطب تبقي دكتورة قد الدنيا.

وكده كده باباها جاي كمان خمس سنين...

وتوجهت بالكلام لنور: اسمعي يا نور إنت لسه في عز شبابك ومكانك
مش هنا ده عالم...

تاني غير عالمك مش هينفع تكوني موجودة فيه.... ويلا بقي امشي
من هنا.

نور: بس أنت وحشاني ونفسي أقعد معاكى...

الجدة: وأنت أكثر بس ما ينفعش دلوقتي قولتلك في يوم من الأيام هنتجمع
كلنا، امشي يلا ارجعي للحياااااااا، والقت بنور في اتجاه حفرة غير
معلومة...

في اللحظة دي كانت نور قلبها توقف وحاول الأطباء يعملولها إفاقة
للقلب ولكنهم فشلوا أكثر من مرة وفي النهاية قرروا أنهم هيحاولوا
للمرة الأخيرة يعملوا صدمات للقلب ولو فشلت هيعنوا الوفاة.....وابتدوا
في إنعاش القلب للمرة الأخيرة وشاءت إرادة ربنا إن قلبها يرجع يعيش
وترجع تاني للحياة وتستعيد وعيها وتفوق في وسط صدمة ممزوجة
بفرحة من الأطباء ورجعت دنيا تاني للحياة.

الفصل الثالث

نور والبداية الجديدة

بعد ساعات من الإستفاقة كانت الأسرة كلها بالكامل جنب نور وكان معاهم دنيا الي تركت كل شئ ونزلت جري أول ما عرفت ان نور فاقت.

والد نور: وحشتيييني أووووي، أنا كنت عارف أنك هتقومي بالسلامة ومش هتسيبيني وأنا مش هبعد عنك ولا هسيبك تاني أنا جنبك لآخر العمر.

نور: يااااه يا بابا ده أنا كنت نسيت حضنك.

الاب: من هنا ورايح مش هتسيه وهتزهقي من وجوده.

نور: طب وماما؟

الأب: هو أنا ما قولتلكيش.... إحنا خلاص رجعنا لبعض.

الأم: يا راجل بطل كذب هو أنا لسه وافقت ده البنيت لسه فايقة ما بقالهاش كم ساعة .

الاب: بحطك قدام أمر الواقع، وأدي الشبكة أهي جديدة قدام الدنيا كلها وهناخد نور ونطلع على المأذون، وبقولك ارجعيلي أنا بحبك.

الأم: بصت لنور، وقالت: أرجعله؟

نور: هزت رأسها بسعادة، وقالت: أيواااااا

الأم بهزار: عشان خاطر ك أنت بس لو عليه هو ميستاهاش.

الأب: قلبك أبيض يا عزيزة بقي الله.

رواية دنيا ونور

يوسف فريد

في لحظة تجلت فيها المحبة والصدقة دخلت دنيا في أحضان نور واستمرت في البكاء بشوق ولهفة وقالت: وحشتيني ، وحشني هزارك ، وحشتني مقابلك ، وحشني مشوار المدرسة، وحشني كل حاجة ما بيننا، كنت مصدقة أنك هترجعيلي....

نور:محدث كان وحشني قدك....إنت بجد كنزي الي طلعت بيه من الرحلة وعكازي الي كان دائما بيبيقي معايا في لحظات وقوعي يارب يديمك في حياتي...

واستمروا الاتنين في البكاء والعناق.

رد والد نور:لا ماهو من هنا ورايح نور عندها بدل العكاز اتنين لان أنا مش هسيبها وهنعمل كل حاجة سوى....وبعدين بقولكوا إيه مش عايز دموع...أنا عريس ومش عايز نكد....ويلا بقي عايزين نلحق المأذون....

وخرجت نور من المستشفى بصحبة العائلة ورفيقة الدرب دنيا واتجه الجميع للمأذون وتم زواج والد نور ووالدتها وكانت ليلة سعيدة وفي أثناء الزواج ببسال المأذون ويقول: هتعقد عليها بشبكة جديدة ومهر جديد طبعاً؟

والد نور:مال وذهب الثانية كله ما يغلاش على حبيبتي وأم بنتي الأصيلة ست الكل.

والدة نور:أنا مش عايزة منك حاجة غير الأمان والحنية.

الأب :أوعدك الي جاي كله سعادة.

المأذون:بارك الله لكما وبارك عليكما وجمع بينكما في خير.

إتلم الشمل ورجعوا الأب والأم لبعض ورجعوا محتضنين بنتهم في
وسطهم وابتسمت الأم وقالت: هخش اعملكوا عشاء
رد الأب: لا مفيش حد هيطبخ أنا النهارده عازمكوا ع العشاء
الأم: طب بس أنا عندي شغل الصبح بدري
الأب: لا من هنا ورايح مفيش شغل من هنا ورايح هتقعدوا في بيتكوا
معززين مكرمين.
الإم: بس...
الأب: مفيش بس يلا خشوا إلبسوا.
ومر الوقت وذهبوا للعشاء وكانت ليلة سعيدة وعشاء مليان بالمحبة
والدفء والألفة وانتهى العشاء ورجعوا إلى بيتهم.
وسهرت نور على تلفونها تكلم دنيا وتقولها:

رواية دنيا ونور

يوسف فريد

أنا النهارده أسعد يوم في حياتي من يوم ما إتولدت أخيرا شفت بابا وماما سوى أخيرا حست يعني إيه عيلة عرفت يعني إيه حزن أب... أنا النهارده بس عرفت يعني إيه عيلة...

ردت دنيا: وأنا فرحانة لفرحتك ، فرحتك وفرحانة أن كل حاجة رجعت صح... هنبتي بقي نذاكر ونمشي مظبوط بقي ولا إيه؟

نور: ده أساسي أنا شايفة نفسي واقفة معاكي على باب كلية الطب.

دنيا: سلامتک يا نور إنت في وعيك يا حبيبتي؟

نور: في وعيي جدا ولأول مرة أكون في وعيي... بقولك إيه بابا بينادي هشوفه عايز إيه وبكره أكمل كلام معاكي... أنا مبسوفة.

دنيا: يا رب دائما يفرح قلبك يا روعي... باي.

دخل الأب على نور وإتكلم معاها:

إيه يا حبيبتي بتعملي إيه

نور: كنت بتكلم مع دنيا

الأب: امممم يعني مش قاعدة ع انت والتيك توك والحاجات دي؟

رواية دنيا ونور

يوسف فريد

نور: لأ لأ ، خالص أنا بطلت الحاجات دي للأبد ومش هرجعلها تاني.... انا عايز أركز في مذاكرتي عشان السنة الجاية أنا ثانوية عامة ونفسي أتفوق وأدخل كلية طب.

الأب: أنا فرحان بيكي أووي بس عارفة في حاجة فهمتها مؤخرا كنت عايز أقولك عليها.....الكاميرا والتليفون والحاجات دي كلها هي مجرد أدوات احنا الي بنتحكم فيها وفي استخدامها...الفكرة مش في إننا نمنع استخدام التكنولوجيا لأن ده مستحيل، لكن الفكرة إننا نوظفها صح...و زي ما نقدر نقدم محتوى مضر نقدر من نفس المنصة نقدم حاجة مفيدة أو نصيحة تأثر في الناس تأثير إيجابي...مش كده ولا إيه؟

نور: كده طبعا معاك حق وهو في كلام بعد كلامك يا بوب...أسيبك انت أنا عايزة أفضل قاعدة بتفرج عليك بس كده حتى لو ما بتتكلمش.

الأب: يا بكاشة.

نور: إوعي تكون ناوي تسافر تاني؟

الأب: لا ما تخافيش أنا نقلت شغلي كله على مصر وخلص مفيش سفر ولا بعد تاني....ورجلي على رجلك في كل خطوة هتعملها.

نور: بحبك يا سندي ربنا يخليك ليا وما يحرمني منك أبدا.

الأب: ده أنا الي بموت فيكي...أنا محتاجك قد ما أنت محتاجالي وأكثر كمان إيه رأيك بقى ولعلمك مش الإبن بس هو الي محتاج لأبوه ، أبوه كمان محتاج لوجوده ولحنانه ولشقاوته ولأنه يشيل مسؤوليته، الحياة من غير الابناء ولا لها لازمة ولا لها طعم...

نور: كل كلمة أنت بتقولها بتفرحني...

الأب: دفعت التمن الغالي أووي عشان أتعلم كل كلمة.... المهم عايزين نركز ونذاكر عشان نخش بقلب جامد ع الثانوية العامة... وكل الي هتحتاجيه من فلوس ودروس وأي حاجة أنا وراكي...
نور: وأنا هشر فك وأرفع راسك وأتفوق وأطلع دكتورة.

مع نهاية الأسبوع وبداية أسبوع جديد في المدرسة كانوا دنيا ونور رجعوا وإبتدوا ينتظموا في الدراسة والمذاكرة...

دخل مستر أحمد مع أول حصة في اليوم وقال : صباح الخير يا بنات...

البنات: صباح النور يا مستر

مستر أحمد :نور، حمد الله ع السلامة عاش من شافك والله قلقانين عليكي ومش لاقيين حد نذنبه.

نور:الله يسلمك يا مستر لا ما تخافش ، هتزهقوا مني بعد كده.

مستر أحمد: حمد الله على سلامتكم أنا فرحت برجوعك.

المهم.... يلا مين فيكوا الي محضرة الدرس الي انا قلت عليه؟

وهنا كانت المفاجأة الي أدهشت الجميع أن نور كانت أول حد رفع إيداه وقالت:

أنا...

مستر أحمد: معقول؟ متبقيش نور...

نور: لا من هنا ورايح هفاجئك.

رواية دنيا ونور

يوسف فريد

مستر أحمد: أول مرة حد يسبق دنيا في الإجابة... يا دنيا واضح كده أن هيفظهرلك منافس.

دنيا: دي أحلى منافس دي.

مستر أحمد: طب قومي يا نور جاوبي...

وقامت نور جاوبت وكانت مختلفة تماما وباين عليها الجراءة والذكاء في الإجابة وكان باين عليها السعادة...

وبعد الحصة راحت نور لمستر أحمد وقالتله:

مستر... أتمني ما تكونش لسه زعلان مني...

مستر أحمد: يا عبيطة، في حد بيزعل من بنته أنا كنت زعلان عليكى وما كانش عاجبني أن مستواكي الدراسي يكون كده بس خلاص الي فات مات أنا فرحان وفخور بيكي وبالتغيير الي حصل ...

نور: وأنا كمان فرحانة ومش مستوعبة أني اتغيرت بالسرعة دي....

ومرت الأيام وخلصت نور تانية ثانوي بمجموع 98% ودخلت مع دنيا تالثة ثانوي وكانت الأمور مستقرة ووالد نور متواجد وبالفعل كانت معاملته متغيرة تماما وكان مع نور لحظة بلحظة مش بيسيبيها ومتكفل بكل دروسها بل وأنه كمان كان في أحيان كثيرة بيسهر يذاكر معاها، ومرت الأيام وخلصت إمتحانات تالثة ثانوي وكانوا الأسرتين في إنتظار المجموع، لحد ما جاء اليوم الموعود وطلعت النتيجة وكانت نور ودنيا جابوا 99% وكانت فرحة كبيرة للأسرتين

وسألت والدة نور والدموع الفرحة في عينيها: قررتي تخشي إيه؟

رد والد نور: هي ودنيا داخلين طب.

ردت الأم: وأنت كنت عارف ومقتلش ده أنا في أسرار بتتخبى عليا بقى

رواية دنيا ونور

يوسف فريد

الأب: طبعا أنا أبو الدكتورة وأنا وهي لنا مع بعض أسرار

الأم: بقيتوا حبايب إنتوا الإنتين وأنا اتسيت

نور: وأنا أقدر أنساكي ياست الكل

الوالد: ده أنت الخير والبركة ياعزيزة

ومرت الأيام ومرت السنين ودخلوا نور ودنيا كلية الطب وقضوا
أجمل أيام عمرهم وكبروا وبقوا دكاترة وتوطدت صداقتهم أكثر وأكثر
لكن نور مكانتش تعرف أنها مع نهاية مسيرتها في الكلية وفي الوقت
الي هتكون فيه في قمة السعادة وإبتسام الحياة لها هتفقد أعز حد عندها،
وهيكتب فصل النهاية.

الفصل الأخير

فرحة ووداع

بعد نهاية إمتحانات السنة الخامسة من كلية الطب وفي أثناء خروج نور من الكلية مع دنيا اتفاجأت بشاب يبدو عليه الوسامة والإحترام نده عليها:

يا أنسة...يا أنسة لو سمحتي...

ردت نور:حضرتك بتنادي عليا؟

قالها:أيوا في الحقيقة أنا كنت حابب أتكلم مع حضرتك ما بيني وبينك.

قالت:لا اتفضل اتكلم هنا في وجود صاحبتني أنا ما تعودتش أكلم شاب لوحدي...

قالها:طيب أنا والله ما بعكس بس أنا اسمي نبيل زميل جنبك هنا في كلية الصيدلة والحقيقي إني شفتك أكثر من مرة وإعجبت بيكي وبأخلاقك وبأسلوبك وكنت حابب أجي أتعرف على والدك وأخطبك منه.

نور:أنا اتفاجأت بصراحة طب ممكن أفكر؟

نبيل:فكري براحتك وأنا مستنيكي أنا شاب ميسور ومن عيلة محترمة...

نور:ايه رأيك يا دنيا؟

دنيا:شكله بيحبك بجد أنت حاسة بإيه؟

نور:أنا حسيت أول ما شفته أني أنا كمان أعجبت به...أنا هستخير ربنا وأشوف....

نور: بابا... كنت عايزة أكلك في موضوع.

الأب: قولي يا حبيبتي

نور: جايلي عريس

سكت الأب لحظات....

نور: مالك يا بابا إنت مش فرحان ولا إيه ، ليه تبكي؟

الأب: لا، أكيد فرحان ، بس حزين إنك هتتاخدي مني.

نور: يا بابا دي لسه خطوبة لسه بدري ما تخافش لسه قاعدة على قلبك
شوية

الأب: حاباه؟

نور: بصراحة... أنا كنت أول مرة أشوفه بس لما كلمني حسيت إنني
إتشدتله وحاسة أنه زي ما هو معجب بيا أنا كمان معجبة بيه.

الأب: يبقي على خير خليه يجي يقابلني.

كلمت نور نبيل وقالتله:..موافقة... بس عندي شرط

قالتله: توعدني أنا لما نتجوز أنت مش هتخون ولا هتبعد ولو بقى في ما
بيننا أطفال عمرك ما هتسيبهم ولا هتتخلي عنهم؟

نبيل: أنا شفت في عمري مليون واحدة ما لقيتش حد شبهك أنا عايز
أعمل بيت عشانك يبقى فيه روحك وتفاصيلك وعمري ما هسيبك.

وجاء نبيل وتمت الخطبة على خير وكان الجميع في سعادة كبيرة
وإنتهى اليوم

رواية دنيا ونور

يوسف فريد

وكان والد نور بيكلم الأم ويقولها:

أنا كده بدأت أحس أن أنا اطمنت ع البنت نسبيا خلصت طب وقريب
هتطلع النتيجة واتخطبت وربنا نظملها حياتها الحمد لله...عايز أنا وأنت
نفوق لنفسنا شوية بقى

الأم:نفوق لنفسنا إزاي؟

الأب:يعني أخذك ونسافر نروح نلف الدنيا نعيش الي ما عيشنا هوش...

الإم:يووووه هو لسه في العمر بقية؟

الأب:أيوا طبعا أنت فاكرانا عجزنا ولا إيه ده إحنا لسه شباب.

الأم:شباب مين يا راجل؟ ده انا بقيت بنهج من طلوع السلم.

الأب:سيبيلي إنت بس نفسك وأنا هدلعك...

الأم:طب تعالي بس ننام عشان إحنا طلع عينينا في التجهيزات بتاعة
الخطوبة وبكره لما نصحي يحلها ربنا في الدنيا الي انت عايز تلفها
دي...

نامت الأم ونام الأب وما كانوا يعرفوا إنها الليلة الأخيرة.

وفي ليلة دي شاف الأب منام كان فيه في مكان جميل كان أول مرة
يزوره كان مكان غاية في الروعة شجر وورود وقصور وشاف ست شبه
الملكات لابسة لبس فخم سألها:أنت مين؟

لفت وابتسمت وقالتله :عرفتني دلوقتي؟

قالها:ماما....ياااه كان ليكي وحشة...

قالتله :وأنت كمان...رغم أنك كنت مقصر في حقي في الدنيا بس أنا
سامحتك أنت كنت واحشني وأن الاوان تجيلي.

الأب :فين؟

والدته:هنا عندي تيجي في حضني مع وسط أهلك وأخواتك...

الأب بس أنا كان نفسي أعيش وأكمل وأجوز بنتي وأفرح بأحفادها.

والدته:بص مش بمزاجك معادك جاء ، روح حضر شنطتك عشان هتجيلي بالليل.

صحي الأب في اليوم من بدري وفضل جالس على سريره يفكر مع نفسه كثير وبعدين والدة نور سألته :

ايه الي مصحيك بدري كده؟

قالها:أنا رايح مشوار.

قالتله :مشوار ايه؟

قالها:مشوار مهم مش هقولك عليه دلوقتي بس لازم أروحه.

قالتله:إنت كويس؟

قالها:طول ما أنا شايفك ببقى كويس.

أنا لازم أنزل...

ونزل الأب وغاب وقت طويل ورجع البيت سألته الأم : إنت كنت فين؟

قالها:حاجة كانت لازم تتعمل...انا جعان وعايز أكل من إيديكي...

قالتله:عيني...أنت فيك حاجة متغيرة؟

قالها:لا أنا كويس ما تخافيش .

وتناولوا مع بعض العشاء الأخير وقالها:

تعالى اقعدى جنبى هنا عايز أتكلم معاكى....

قالتله :جينا قول؟

قالها:تعرفى أنى لفيت الدنيا وشففت العجايب وشففت حاجات كثير حلوة بس ما شففتش حاجة حلوة زيك رحلتى كانت ناقصاكي وكملت بوجودك، أنا بتمنى الخمس سنين الي قضيناهاهم سوى يكونوا نسوكى الي أنا عملته وقدرتى تحببني وقدرت أنسيكي الوجع الي سببتهولك، ولو في زعل في قلبك بترجاكي تنسيه.

قالتله:أنا مش زعلانة منك ونسيت كل حاجة من يوم ما حسيت أنك اتغيرت معايا ومع بنتك وبقيت أب حقيقي بس أنا مش فاهمة كلامك ومن الصبح وأنا قلبي مقبوض.

قالها:أنا كان بودي أكمل معاكى الرحلة أكثر من كده وأشبع منك وأعوضك عن الي أنا وريتهولك زمان لكن للأسف رحلتى خلصت وأواني جاء وأنا بحمد ربنا على أنه أدانى نعمة وهدية زيك وبحمد ربنا أن آخر حاجة هشوفها قبل ما أموت هي عيونك...عايز أقولك وصيتي هتلاقيها جوه في دولابي، هتوحشيني يا أغلى الناس....أشهد ان لا اله الا الله وان محمد رسول الله

وابتسم وانتقل لجوار ربه وأسلم الروح لخالقها وتوفي بعد مكان هو العشق والسند للأم والبنت وبعد ما ساب في حياتهم بصمة كبيرة....

وبعد نهاية العزاء وفي وسط الزعل والأحزان طلعت الأم الوصية ولأنها كانت منهارة ومش قادرة تقرا هي ونور أدوا الوصية لدنيا تقرا وابتدت بالقراءة:

نور....يا بنت عمري وثمره فؤادي يا دكتورة المستقبل المنتظرة...اوعى تبكي أوتزعلي...أنا في مكان أحسن....أنا قضيت معاكى خمس سنين عندي بالعمر كله...كنت عايز أقولك أنى اشتريتك

رواية دنيا ونور

يوسف فريد

عيادة جميلة علشان تشتغلي فيها وتبقى بتاعتك أنا بعيد بس شايفك
وسامعك وحاسس بيكي.

ثانيا :عزيزة قلبي يا ست الكل وشريكة عمري وعكازي أنا اشتريتلك
المحل الي كنت بتحلمي بيه.....وكمان البيت الي شفناه سوى وحسيت
أنه عجبك اشتريتتهولك وكتبتته بإسمك.

ثالثا:حبيبتي دنيا الي ياما وقفت جنب بنتي وشالتها وقت أزمتهها وكانت
سند لها...أنا كنت عارف أن باباكي مؤخرا بيمر بأزمة مالية في
شركته...علشان كده أنا سبتله فلوس تحل أزمته وترجعه أقوى من
الأول....أنا بحبكم كلكم وكلكم هتوحشوني...خلي بالكم على بعض...

ردت نور: لو كان مات في نفس اليوم ده من خمس سنين يمكن مكانش
هيألمني غيابيه لأنه كده كان غايب....لكن النهارده أنا حسيت أني
ظهري اتكسر وعرفت قد ايه أنا بحبه....أنا جزء مني راح معاه...ومش
هيرجع تاني.

النهاية

خاتمة

نور بقت دكتورة وحياتها اتغيرت 360درجة لأن أبوها لحق نفسه
وصلح خطاه لو كانت نور أبوها عند أو كمل شجار مع مامتها يمكن
كانت نور ضاعت للأبد أو الي حصلها كان يبقى أسوء

نور لما باباها قرر يرجع وندم كان هو أول واحد استفاد وفرح وجني
ثمار النجاح والتفوق العلمي وطلع للمجتمع دكتورة... ولما جاء يتوفي
كانت بتحبه واطرحت عليه وحست بمرارة فقده...

طب لو كان استمر في أفعاله وشخصيته الي كان عايش بها في الأول...ممكن كان يوم موته بالنسبة لها يوم عيد أو ما تزعلش عليه من الأساس.... خلاصة القول...لو عايز إبنك أو بنتك يكونوا جنبك خليك جنبهم حبهم ومن روحك وقلوسك وصحتك ووقتك إديهم عشان لما تكبر تلاقيهم جنبك أصحاب وأحباب وبعد ممالك يفضلوا يدعوك ويفتكروك بالخير....

إنما لو هجرتهم وقسيت عليهم هتعيش وتموت وحيد وهتحرم نفسك من نعمة كبيرة ... حب ولادك وعيش لهم لما تحتاجلهم هتلاقيهم.

دنيا ونور

رواية إجتماعية تعالج قضية
الطلاق ومخلفاته السلبية وتعد
الرواية أول عمل روائي يخط به
الكاتب طريقه نحو المسيرة الأدبية

قد تكون الحياة مره وسكرها صديق

كاتب وإعلامي مصري متحصل علي
الإجازة في آداب الإعلام والصحافة
بجامعة عين شمس ، بدأ مسيرته

يوسف فريد
الكتابية حديثا بسنة ٢٠٢٣ بعمر يناهز
٢١ عاما واشتغل بعدة أعمال منها:

١-راديو الجيل الجديد/ليالينا

٢-برنامج امسك في الحلم/نقطة وصول

٣-كتابة اسكرت برآمج مثل: حلم العمر/
حلم الحياة

